

Nous nusezzas faschagn la nossa istorgia!

«Dovrigl ansomma feminissem?» – Cun chella dumonda sung ia adegna puspe confruntada.

Exact an chels muments am vign andamaint igl citat da Simone de Beauvoir: «L'antiera istorgia da donnas è neida fatga digls omens». E cun sgarschour stò ia realisar, tgi ena gronda part dalla societad vei betg, tgi la istorgia da donnas è anc adegna dominada dad omens. Percheigl è la mia rasposta sen chella dumonda curta: Ea, an mintga cass!

La rasposta detagleda è en po pi cumplexa, pero tgapibla, schi la viglia è cò. Chest text è ena approximaziun ad en tema cumplex, tgi sa basa sen en sistem patriarcal.

Igl antscheva cun la differenza dallas paias. Tenor igl Uffezi federal da statistica è la differenza da paias tranter donnas ed omens igl onn 2018 stada tar 12,0%. Per demonstrar: Ena donna tgi ò antschet a luvrar igls 01-01-2021 lavoura gratuit anfignen igls 20 da favrer, en om tgi ò antschet igl madem taimp è paea davent dalla antschatta. La cunsigliera federala *Simonetta Sommaruga* ò declaro chel stadi cleramaintg alla sessiun da donnas. Schi dei tgi la lavour da donnas vala pi pac e la societad dat da creir a donnas, tgi ellas valan pi pac, prospereschan igl sexissem e la discriminaziun venavant.

La Svizra è dependenta da lavour paeda, ma cunzont er da lavour fatga voluntariamaintg e gratuita. Summa summarum èn igl onn 2016 neidas prestadas 7,8 milliardas ouras da lavour paedas e 9.2 milliardas ouras da lavour betg paedas. La lavour nunpaeda sa metta ansemen da lavour da tgesa e famiglia (p.ex. tgira d'unfants, cuschinar, etc.) e lavour voluntaria (p.ex. tgira da beadis e beadias, angaschi ainten ena uniun). Donnas surpeglian dus terzs da chella lavour tgi è relevanta pigl sistem. E chegl influenzescha directamantg la posiziun da donnas aint igl mond professiunal e surtot las rentas da donnas. Dalla cumpatibilitad da famiglia e professiun vign anc adegna piglia mengia pac risguard, uscheia tgi bleras donnas on mianc la schelta tranter luvrar venavant ainten lour professiun u surpiglier la lavour nunpaeda.

Donnas cun pitschens pensums e chellas, tgi surpeglian la lavour nunpaeda on loccas massivas aint igl provedimaint da vigliadetna. Per consequenza on donnas an media ca. 20 000 francs pi paca renta tgi omens ad onn. An consequenza èn ellas pertutgeidas pi savens dalla povradad dalla vigliadetna. E glez quasi scu «angraztg» per trer se e tgirar la proxima generaziun.

Venavant è mintga tschintgavla donna ena victima da violenza sexuala. Starmentous blers delicts sexuals vignan mianc tgisos, cuncheigl tgi victimas survignan savens betg raschung. Glez graztg alla nossa lescha sexuala, tgi fundescha betg sen la maxima da consentimaint, mabagn segl prancepi, tgi victimas ston expressivamaintg deir NA e sa dustar. Glez è savens mianc pussebel perveia digl stadi da schoc. La maxima da consentimaint fiss miglra. Lezza pretendiss percuntrar, tgi sex sainza consentimaint seia ena violaziun.

Digl reminent è angal en quart dallas posiziuns scientificas an Svizra occupadas da donnas. Chegl magna tigl schinumno gender data gap. Igl gender data gap è la mancanza d'infurmaziuns scientificas davart igls aspects fisicals e psichics da donnas. La scienza peglia per retschertgas e perscrutaziuns predominantamantg prototips masculins, donnas da l'oter mang èn ena divergenza dalla norma. Chegl sa mossa an divers aspects: Per exaimpel èn igls sintoms per en infarct digl cor tar donnas betg perscrutos, la tschinta da sierezza ed igl airbag

èn coordinos per igl corp masculin ed er igl scoldamaint è drizzo aint per omens. Ainten la scienza è igl motto «it's a man's world» deplorablamentg anc fitg preschent.

I dess anc indumbrabels exaimpels davart la inegalitad tranter las schlattagnas. E schi dei tgi visiuns calan lò, noua tg'igl noss futur antscheva, dovrigl feminissem. E betg d'amblidar: er omens profiteschan digl feminissem – el igls dat la schanza da sa deliberar da rollas viglias da schlattagna e da reinventar lour rolla ainten la societad.

Per cattar ena fegn, lessa pero neir tar aspects concrets per ena midada aint igl noss sistem patriarcal.

Igl mond dovra testas avertas e progressivas. Er duple donnas ainten mastiers da MINT (professiuns da matematica, informatica, scienza naturala e tecnica) e professiuns academicas è necessari. I dovra discussiuns fundamentalas sur dalla nossa societad e las rollas da donnas ed omens.

Fitg impurtant è surtot er ena represchentaziun eguala ainten gremis politics. Percheigl donnas: nous ischan 51% dalla populaziun. Seias curaschousas – vous savez chegl. Furme gruppas, collie las vossas fermezzas, tschartge alliieidas ed az sustigne l'egna l'otra.

Schintgigia ans vign navot, pero ansemen ans totga igl mond!

Luna Weggler